

Nos fondos hai carbón

Mírote a los güeyos
cuando llores ¿por qué
guardes el rencor?
Enantes tabes tan llena de
vida, güei nun llate'l
corazón.

Los pozos agora solo son
tumbes qu'entierren el to
dolor, sacáronte la sangre
color negro les tos venes
de carbón.

Muchos fingieron
querete, buen güeyu tien
el Lladrón, mientras hubo
intereses llenaron bien los
bolsos, pero güey que
ya nun queden van
y dexánmos ... solos.

Los chigres de les
cuenques ficieronse
velatorios de lutu tan los
sos fíos beben pa prontu
olvidar, qu'ensín mina
nun hai vida, qu'ensín mina
nun hai cuenca qu'ensín
mina nun hai trabayu
¡ensin mina nun hai na!

Solo cabrones que muerden
la codicia ente los
dientes cuando roben de
los fondos la so parte
del pastel, arriba bien
repartieron ensin ensuciar
les manes pero abaxo
emporcáronse los mesmos
de siempre.

O toi ciegu o nun lo veo
¿vien la restructuración?
Nun hai mina nun hai
empleos, opciones a cual
meyor. Los fondos yá nun
son mineros paez que güei
valen pa too. Que se

dexen de museos,
volvamos picar ... ¡carbón!
Col pasar de los años yá
nun se verá la herida,
aunque pises y tea firme ta
baxo'l suelu escondía. El
futuru nun verá lo que
yera esta vida, dexaráse
d'escuchar "¡compañeru,
dame tira!". Los mineros yá
s'estinguen mitoloxía na
mina, fósiles de barricaes
estudiáranse dalgún día.

Nos fondos tovía hai
carbón, pero nun rentabiliza,
val más dir págalo fuera
que picar la hipocresía.

(Estribillu)